
Бир юз ўн учинчи баҳорли момо

Президентимиз Фармони билан Учкўприк тумани Сариқўрғон қишлоғида истиқомат қилувчи 113 ёшли Шаҳринса момо Позилова “Шуҳрат” медали билан тақдирланди.

1905 йилда таваллуд топган Шаҳринса момонинг суяги меҳнатда қотган. Далада кетмон чопди, пахта терди, қурт боқди. Фронт ортида эркаклардек шижоат билан ишлади. Уч нафар фарзандини оқ ювиб, оқ таради. Кичик дилбанди Замирахон икки ёшга кирганида турмуш ўртоғидан айрилиб қолган эди. Шу-шу икки ўғил, бир қизига ҳам она, ҳам ота бўлиб, бор меҳрини берди. Қийинчилик келганда сабр, бахт келганда шукур қилди. Мана, бугун онахон 40 дан зиёд неvara, чеваралар ардоғида. У ҳамиша давлатимиз, маҳалла-куй эътиборида эканлигини яхши ҳис қилади.

Вилоят ҳокими Шуҳрат Ғаниев онахон истиқомат қилаётган хонадонга бориб, “Шуҳрат” медали ва пул мукофотини ўз эгасига топширди. Пиру бадавлат кексаларимиз юрт бойлиги, хонадонлар файзи, оилалар баракаси эканлигини таъкидлаб, онахонга узоқ умр, сиҳат-саломатлик тилади.

Ш.Позиловага вилоят ҳокимлигининг қимматбаҳо совғаси – замонавий телевизор, ҳомий ташкилотлар томонидан ажратилган аравача, озиқ-овқат маҳсулотлари ҳам тақдим этилди.

Шаҳринса момо бу эътибордан кўнгли яйраб, дуога қўл очар экан энг аввало юртга тинчлик, элга хотиржамлик тилади.

– Биз кексаларга алоҳида эътибор қаратган Юртбошимга раҳмат! Вилоят раҳбарининг хонадонимда биринчи бор бўлиши эмас, мана, яна медални кўксимга таққани келди. Бу йўқловлардан, мукофоту совғалардан бошим кўкка етди, – дейди момо қалбда қувонч, тилда шукроналик ила.

Соҳиба АБДУРАҲМОНОВА.

2018-09-05 11:44:48